

दिनांक 07.01.2025

समय: 18.45 बजे

- मुख्य चुनाव आयुक्त राजीव कुमार ईवीएम ने फूलप्रूफ डिवाइस बताता गैर वोटिंग रा अंदेशा ने नकार्या।
- राज्य की नुवी मतदाता सूची मांय वोटर तादाद बधने 5 करोड़ 45 लाख ऊं बत्ती व्ही-मतदाता लैंगिक अनुपात मांय ई सुधार।
- स्वास्थ्य मंत्रालय एचएमपीवी ने देखता राज्यां ने घणा सांस रा संक्रमण माथे निगे मजबूत करण की सलाह दी।
- जयपुर मांय काले ऊं राज्य थर रा युवा महोत्सव की सरूआत-12 जनवरी ताई न्यारा-न्यारा आयोजन व्हेला।
- प्रदेश मांय आवता दो दिनां मांय तापमान मांय और कमी आवण रा आसार-कोहरा ऊं सड़क, रेल अर हवाई यातायात माथे असर।

000

मुख्य चुनाव आयुक्त राजीव कुमार कयो है के ई.वी.एम. फूलप्रूफ डिवाइस है। इण मांय गैर वोट रो अंदेशो नी है। श्री कुमार नुवी दिल्ली मांय चुनाव महकमां कानी ऊं व्हा खबर नवीसां रा सम्मेलण मांय बोल रह्या हा। मुख्य चुनाव आयुक्त ई.वी.एम. माथे उठायी ज्या न्यारा-न्यारा सवालां ई जवाब दिया।

.....

मुख्य चुनाव आयुक्त दिल्ली विधानसभा चुनाव कार्यक्रम रो ऐलाण करता बतायो के सगळा 70 सीटां माथे पांच फरवरी ने वोट पडेला अर 8 फरवरी ने वोटों की गिणती व्हेला।

000

प्रदेश मांय मतदातावां की तादाद बधने 5 करोड़ 45 लाख 69 हजार 501 व्हे गयी है। 200 चुनाव हलकां मांय 2 करोड़ 82 लाख 46 हजार 146 पुरुष अर 2 करोड़ 63 लाख 22 हजार 684 महिला मतदाता अर 671 थर्ड जेंडर वोटर रा नाम दर्ज है। खास संक्षिप्त पुनरीक्षण कार्यक्रम रे पछे आज चुनाव महकमो मतदाता सूचियां रो आखिरी प्रकाशन कर दियो है। मुख्य चुनाव अहलकार नवीन महाजन बतायो के लारली साल अक्टूबर महीना मांय प्रारूप मतदाता सूचियां छपीजण रे पछे संक्षिप्त पुनरीक्षण कार्यक्रम रे दौरान 13 लाख ऊं बत्ती वोट दे सकण वाळा रा नाम जोड़ी ज्या है। वणा कयो के सूचियां मुजब पंजीकृत मतदातावां रा लैंगिक अनुपात मांय घणो सुधार व्हीयो है।

.....

000

केंद्रीय स्वास्थ्य सचिव पुण्य सलिला श्रीवास्तव कह्यो के ह्यूमन मेटा न्यूमो वायरस-एच.एम.पी.वी. ऊं लोगां ने घबरावण की जरूरत नी है। राज्यां अर केंद्र शासित प्रदेशां रे साथै वीडियो कॉन्फेस की मार्फत वणा आ बात कही। केन्द्रीय स्वास्थ्य सचिव मीटिंग मांय सांस ऊं जुड़ी बीमारियां रा हालात अर सार्वजनिक स्वास्थ्य उपाया की समीक्षा ई करी। वणा राज्यां ने इन्फ्लुएंजा जैसी बीमारी अर चिंता जोग सांस रा संक्रमण माथे निजर मजबूत करण की सलाह दी।

.....

अठिने चिकित्सा मंत्री गजेन्द्र सिंह खींवर कह्यो है के राज्य की स्वास्थ्य प्रणालियाँ अर निगरानी नेटवर्क सावचेत है। वणा कह्यो के स्वास्थ्य ऊं जुड़ी किणी ई चुनौती ऊं तुरत निपटण की सगळी तैयारियां तय करी जावे। केई जिला कलेक्टरां ई ई बारा मांय मीटिंग करी। भीलवाड़ा मांय चिकित्सा महकमा कानी ऊं जिला कंट्रोल रूम ई बनायी ज्यो है।

000

प्रदेश मांय गणतंत्र दिवस रो राज्य थर रो जळसा रो ई बार उदयपुर मांय आयोजन होवण जा रियो है। मुख्यमंत्री भजनलाल शर्मा आज जळसा की तैयारियां रा बारा मांय समीक्षा मीटिंग करी।

मुख्यमंत्री रेहवास माथे व्ही ई मीटिंग मांय श्री शर्मा अहलकारां ने जळसा रा सगळा बन्दोवस्त सुचारु करण अर चाइजता हिफाजती बन्दोवस्त करण रा निर्देश ई दिया।

000

अजमेर मांय चाल रह्या सूफी संत ख्वाजा मोईनुद्दीन हसन चिश्ती रा 813वां उर्स मांय आज मुख्यमंत्री भजनलाल शर्मा कानी ऊं चादर पेश करीजी। भाजपा अल्पसंख्यक मोर्चा रा प्रदेश अध्यक्ष हमीद खां मेवाती आ चादर चढ़ाई।

000

जयपुर मांय काले ऊं राज्य थर रा युवा महोत्सव री शुरुआत होवण जाय री है। ओ महोत्सव 12 जनवरी ताई चालेला। महोत्सव रो मसौदो थीम विज्ञान, प्रौद्योगिकी अर नवाचार रखी ज्यो है। ई दौरान न्यारी-न्यारी होड़ा अर कार्यक्रम व्हेला। युवा मामला अर खेल मंत्री कर्नल राज्यवर्द्धन राठौड़ आज महकमां रा अहलकारां साथे महोत्सव री तैयारियां रो जायजो लियो। और ब्यौरो म्हारा खबरनवीस ऊं—

.....

000

नुवी दिल्ली रा भारत मंडपम मांय आज राज्यां अर केन्द्र शासित प्रदेशां रा परिवहन मंत्रियां री मीटिंग व्ही। केन्द्रीय सड़क परिवहन अर राजमार्ग मंत्री नितिन गडकरी इण री सदरत करी। श्री गडकरी सोशल मीडिया पोस्ट मांय कह्यो के बदलती परिवहन नीतियां ने बरोबर रूप ऊं लागू करण सारु इण तरह री बतळ जरूरी है। उपमुख्यमंत्री अर राज्य रा परिवहन मंत्री डॉ. प्रेमचंद बैरवा ई मीटिंग मांय भेळा व्ह्या। सोशल मीडिया पोस्ट मांय डॉ. बैरवा लिख्यो के ई बैठक मांय राष्ट्रीय परिवहन नीति, सड़क सुरक्षा रा ठावा तरीका अर परिवहन हलका मांय डिजिटल निपटारा माथे बतळ करीजी। साथे ई वाहनां रा प्रदूषण माथे काबू करण, ईंधन खमता मांय सुधार अर सार्वजनिक परिवहन ने और मजबूत बणावण रा बारा मांय ई बतळ करीजी।

000

राज्य मांय सड़क सुरक्षा म्हीना रे तैत केई जाग जगावण वाळा कार्यक्रम व्हे रिया है। ई कड़ी मांय आज भरतपुर मांय कलाकारां नुक्कड़ नाटक रे मार्फत यातायात नियमां री पालना करण री सीख दी। पाली मांय वाहन चालकां ने यातायात जागरुकता सामग्री बांटी ज्यी। साथे ई जाडन टोल प्लाजा माथे वाहन चालकां री आंख्यां अर सेहत जांच करीजी। वां ने मुफ्त चश्मा ई बांटी ज्यो। डूंगरपुर मांय परिवहन अर पुलिस महकमा कानी ऊं बाइक रैली निकाळी ज्यी।

000

प्रदेश मांय आवता दो दिनां मांय तापमान मांय कमी आवण रा आसार है। मौसम विभाग मुजब कमती रा तापमान मांय 2 ऊं 4 डिग्री सेल्सियस री कमी आ सके है। वठे ई बीकानेर, जयपुर अर भरतपुर संभाग मांय कठे-ई-कठे सीळो बायरो चालण री आस है।

इण रे साथे ही 8 ऊं 10 जनवरी ताई उदयपुर अर कोटा संभाग रा ज़िला मांय ई सीळा बायरा रो असर रह सके है। ई बीच आज नागौर मांय करड़ी ठण्ड रो असर रीयो अर कमती रो तापमान 2 दशमलव 5 डिग्री सेल्सियस रिकॉर्ड व्ह्यो। सिरौही, भीलवाडा, चित्तौड़गढ़, दौसा, जालौर, पिलानी, बीकानेर, जोधपुर अर जैसलमेर मांय कमती रो तापमान 7 डिग्री सेल्सियस ऊं नीचे रीयो। केई ठौड़ां घणी धूअर छाया ज्यी री। उत्तर-पश्चिम रेलवे रा मुख्य जनसम्पर्क अहलकार शशि किरण बतायो के कोहरा रे कारण केई रेलगाडियां देरी ऊं चाल री है।

.....

हवाई यातायात माथे ई इण रो असर दिख्यो। जयपुर मांय कोहरा रे कारण लगातार उड़ानां रो बगत बिगड़ रीयो है। ई कारण गुजरी रात अर आज सवांरा जयपुर एयरपोर्ट ऊं 11 उड़ानां आप रा तैय वक्त माथे नी तो आय सकी अर नी उड़ान भर सकी। न्यारा-न्यारा बगत माथे दिल्ली बेंगलुरु, मुंबई, गोवा अर दुबई सारु उड़ानां बगतसर नी जा सकी। वठे ई कुछ उड़ाना आप रा तय बगत माथे नी उतर सकी। ई कारण घणी तादादर मांय यात्रियां ने जयपुर हवाई अड्डा माथे परेशान व्हणो पड़्यो। राज्य मांय ठण्ड रा तीखा तेवर देखता स्कूलां मांय सर्दी री छुट्टीयां बधा दीरीजी है। ठण्ड रे कारण कोई 20 जिलां रा स्कूलां मांय छुट्टी कर दीरीजी है। माध्यमिक शिक्षा निदेशक आशीष मोदी हुकम काड़ ने जिलां कलेक्टरां ने 11 जनवरी ताई छुट्टी ऐलाण करण सारु मुकर कर्या है।

बाड़मेर मांय काले ऊं साहित्य उत्सव री सरूआत होवण जाय री है। ई दौरान पुस्तक मेळो ई लगायो जाएला। उत्सव मांय थार चौपाल अर शिक्षक सेमीनार रे अलावा लोक कलाकारां री सांस्कृतिक प्रस्तुतियां ई व्हेला। म्हारा खबरनवीस बतायो के शिक्षा महकमा कानी ऊं व्हे रिया ई आयोजन ने ले र साहित्य अर कला प्रेमियां मांय उमाव है।

.....